

Հայտարարություն ՁԼՄ-ների ներկայացուցիչների նկատմամբ ՀՀ Ազգային ժողովի պատգամավոր Մհեր Մեղրակյանի անպարկեշտ պահվածքի կապակցությամբ

Փետրվարի 22, 2016

Փետրվարի 19-ին՝ ՀՀ Ազգային ժողովի արտահերթ նիստի օրը, ՀՀԿ խմբակցության պատգամավոր [Մհեր Մեղրակյանը լրագրողների հետ](#) առնչվելիս ծայրահեղ լկտի պահվածք է դրսևորել։ Նախ՝ նա, նկատելով խորհրդարանի միջանցքում հավաքված թղթակիցներին, նրանց համար լսելի ձայնով ասել է. «Էս ի՞նչ նախիր ա», այնուհետև, երբ ՁԼՄ-ների ներկայացուցիչները բացատրություն են պահանջել, պատգամավորը փորձել է անմեղ ձեռնալ, իսկ հետո սեռական բնույթի հայհոյանքներ է հնչեցրել լրագրողներից մեկի հասցեին։ Չբավարարվելով դրանով, Մհեր Մեղրակյանը փորձել է տանել նրան «առանձնագրույցի»։

Հիշեցնենք, որ նույն պատգամավորն առաջին անգամ չէ, որ նման վարք է դրսևորում խորհրդարանում հավատարմագրված լրագրողների նկատմամբ։ Այսպես, 2012թ. դեկտեմբերի 19-ին նա «ծնոտ պոկելու» սպառնալիքով ու այլ անվայել արտահայտություններով էր արձագանքել [«Ա1+»-ի լրագրող Մհեր Արշակյանի](#)՝ հարց տալու փորձին, իսկ 2014թ. մայիսի 22-ին փողոցային հայհոյանք էր [հնչեցրել Tert.am կայքի թղթակցի](#) հասցեին։ Թեև Ազգային ժողովի էթիկայի հանձնաժողովն անդրադարձել է Մհեր Մեղրակյանի վարքին ու որոշել, որ նա, վիրավորելով «Ա1+»-ի լրագրողին, խախտել է պատգամավորական էթիկան, դա, ինչպես երևում է, որեւէ ազդեցություն չի ունեցել ՀՀԿ-ականի վրա։

Մենք՝ ներքոստորագրյալ կազմակերպություններս, արտահայտելով մեր վրդովմունքը Մհեր Մեղրակյանի նողկալի վարվելակերպի առնչությամբ, ինչպես նաև հաշվի առնելով, որ նման դեպքեր բազմիցս են տեղի ունեցել՝ նաև այլ պատգամավորների ու պաշտոնյաների մասնակցությամբ, պահանջում ենք.

– Հանրապետական կուսակցության ղեկավարությունից՝ քննարկել իրենց կուսակցի հարցն ու պատասխանատվության ենթարկել նրան՝ հորդորելով ինքնակամ վայր դնել պատգամավորական մանդատը,

– Ազգային ժողովի նախագահից եւ ՀՀԿ խմբակցությունից՝ հրապարակավ դատապարտել այս պատգամավորի վարքը, ներողություն խնդրել ԱԺ-ում հավատարմագրված բոլոր լրագրողներից, ում վիրավորանք է հասցվել, եւ երաշխիքներ տալ, որ նման դեպքեր այլևս չեն կրկնվի,

Եթե մեր այս պահանջները չիրականացվեն, մենք հիմք ենք ունենալու արձանագրել, որ Հանրապետական կուսակցության եւ իշխանության տարբեր օղակների համար նորմ է Մհեր Մեղրակյանի եւ նրա նմանների վարքագիծը։ Եվ քանի որ Հայաստանի իշխանություններն ի գործու չեն կամ չեն ցանկանում պաշտպանել լրագրողներին տարաբնույթ սպառնալիքներից, ճնշումներից ու ոտնձգություններից, մենք ստիպված ենք լինելու ապավինել միջազգային

հանրությանը՝ կոչ անելով անհատական պատժամիջոցներ կիրառել, ինչպես դա արվում է այն անձանց նկատմամբ, ովքեր պարբերաբար ու ցուցադրաբար խախտում են օրենքները, դրա համար պատասխանատվության չենթարկվելով սեփական երկրում:

ԽՈՍՔԻ ԱԶԱՏՈՒԹՅԱՆ ՊԱՇՏՊԱՆՈՒԹՅԱՆ ԿՈՄԻՏԵ

ԵՐԵՎԱՆԻ ՄԱՍՈՒԼԻ ԱԿՈՒՄԲ

ՄԵԴԻԱ ՆԱԽԱԶԵՌՆՈՒԹՅՈՒՆՆԵՐԻ ԿԵՆՏՐՈՆ

ԼՐԱԳՐՈՂՆԵՐԻ «ԱՍՊԱՐԵԶ» ԱԿՈՒՄԲ

ՀԱՆՐԱՅԻՆ ԼՐԱԳՐՈՒԹՅԱՆ ԱԿՈՒՄԲ

ԻՆՖՈՐՄԱՑԻԱՅԻ ԱԶԱՏՈՒԹՅԱՆ ԿԵՆՏՐՈՆ

ԲԱԶՄԱԿՈՂՄԱՆԻ ՏԵՂԵԿԱՏՎՈՒԹՅԱՆ ԻՆՍՏԻՏՈՒՏ -ՀԱՅԱՍՏԱՆ

«ԼՐԱԳՐՈՂՆԵՐ ՀԱՆՈՒՆ ԱՊԱԳԱՅԻ» ՀԿ

«ԼՐԱԳՐՈՂՆԵՐ ՀԱՆՈՒՆ ՄԱՐԴՈՒ ԻՐԱՎՈՒՆՔՆԵՐԻ» ՀԿ

ԳՈՐԻՍԻ ՄԱՍՈՒԼԻ ԱԿՈՒՄԲ